

► Vice Promer Ministro Drs. Marisol Tromp na ocasion di celebracion di Dia di Betico: Ta keda awor n'e generacion nobo di politiconan pa duna e contenido real n'e idealnan y n'e Aruba Nobo cu Betico semper a bringa pe hunto cu su pueblo

ORANJESTAD - Ayera mainta na ocacion di e ceremonia protocolario riba Plaza Betico Croes, relaciona cu e fecha di nacemento di e estadista Betico Croes, a hiba palabra, drs. Marisol Tromp como Vice Promer Minister, ya cu Promer Minister ta den exterior. Na e ocasion aki el a papia riba e idealnan di e fayecido lider y cual idealnan e politiconan hoben mester finaliza di realiza nan.

"Como mandatario hoben semper mi ta gusta siña y lesa di lidernan grandi con a base di un ideal y un vision nan ta logra metanan grandi y husto pa nan pueblo. For di nan lucha y historia mi persona sigur ta haya mas inspiracion, forza y experiencia pa sigui lucha pa nos pueblo. Un di e lidernan sigur cu hopi di nos politiconan, especialmente esnan hoben por siña hopi di dje ariba diferente tereno, entre otro ariba strategia politico, cultura y especialmente kiko ta stimacion pa un pueblo, ta Betico Croes. Como un hoben cu a sigui diferente documentario die bida y lucha di Betico, mi mester bisa cu cada biaha cu bo studia nan bo ta haya mas inspiracion y nocion di con lew strategia politico ta jega, pero loke pami



ta mas importante ta kiko nos por siña for di dje pa futuro."

E mandatario tambe a bisa cu Betico semper a muestra cu si bo kier logra progreso y felicidad pa bo pais bo mester tin: democracia, union y libertad. Sin e basenan aki nos no ta logra cosnan grandi y ni tampoco lo nos por yega na un Aruba fuerte. Cu otro palabra pa nos por logra cambianan grandi mester di participacion real di tur hende pa den un forma democratico scohe e caminda cu mayoria kier bai. No ta bai pa manda sino pa convence e pueblo unda nos tin cu bai.

Esaki ta e arte cu un mandatario y politico mester tin. "Akinan mi mester bisa cu Betico Croes ta magistral pa

convence te hasta su contrincantenan. Tambe mester bisa cu un di su forzanan cu te awe mi ta reconoce ta su forsa pa union, den cual su persona no conoce distincion di raza, color of religion."

Na final drs. Tromp a bisa cu "mescos cu Betico Croes a bisa nos pueblo den su tempo, e generacion nobo di politiconan di su partido mester a bini pa logra e idealnan di nos antepasadonan cual ta e Status Aparte, mescos mi ta convenci cu nos tin un generacion nobo den politica cu mester bai construi nos pais basa ariba mes un criterionan cual ta democracia, union, husticia social y libertad."

